



1 4
1544
157



14
1544
157

從墨錄卷八

雲結名字

蜀編 李調元 兩村

武進趙熊詔號襄萼恭毅公申喬長子也生前一夕
祖夢神授一軸雲彩幡結熊詔二字遂以為名果中
康熙四十八年己丑狀元官至侍讀是科榜眼桐城
戴田有會元也以著南山集銷燬 探花秦
州繆沅字湘宜官至禮部侍郎

文勤理學

漳浦蔡文勤公世遠字問之漳浦人康熙己丑進士

14
1544
157

淡墨錄卷八

雲結名字

蜀綿 李調元 兩村

武進趙熊詔號襄萼恭毅公申喬長子也生前一夕
祖夢神授一軸雲彩幡結熊詔二字遂以為名果中
康熙四十八年己丑狀元官至侍讀是科榜眼桐城
戴田有會元也以所著南山集銷燬 探花泰
州繆沅字湘芷官至禮部侍郎

文勤理學

漳浦蔡文勤公世遠字聞之漳浦人康熙己丑進士

淡墨錄

卷八

出安溪李文貞公之門選庶吉士大甲貞以程朱之學教後進公故習宋儒書既見文貞卓然以聖賢爲必可學既歸巡撫海康陳清端公請主鰲峯書院雍正改元特召還朝授編修入內廷侍皇子講讀卯入酉出者十年歷陞至禮部右侍郎皇子親王並加禮敬郡王就學者自署受業遭逢極儒者之榮矣嘗修復古禮行于鄉農人販夫皆知嚮化環居數十里無博塞者二十餘年以地居梁山麓學者稱梁山先生卒年五十二謚文勤所著二希堂古文詩十五卷二希云者公自記云學問未敢朱文公庶幾

其真希元乎事業未敢望諸葛武侯庶幾其范希文乎未幾公又與高安朱文端編歷代名儒名臣循吏可見其志矣

文敏好佛

張文敏公照字得天華亭人善書康熙己丑庶吉士歷官至刑部尚書從來善書者皆謚文敏如元趙孟頫明董其昌本朝自嵇曾筠以治河謚文敏外照一人而已文敏性地高明好佛其詩右磕右觸皆禪語也

學使之冠

長洲惠士奇康熙戊子解元己丑進士打細修兩任
粵東提學專以經學取士爲數十年粵東學使之冠
官至侍讀著有牛農易禮春秋諸說歸耕人海等集
請託不行

宿遷徐用錫字壇長未遇時赴都試如廁見大肉塊
遍身有眼知爲太歲用錫記書載鞭太歲者轉禍爲
福因與家下次第笞擊每擊一眼則遍身眼愈加閃
爍是歲登薦連捷己丑進士以李文貞薦改庶吉士
官至侍講乙未充會試房考關節不行有徐覺民者
御史董之燧門生也以用錫不受請託聳之燧奏用

錫把持科場

聖祖察其情將本發還

文襄治河書

靳文襄公輔字紫垣遼陽人康熙己丑 特賜翰林
編修改兵部郎中進武英殿學士兼禮部右侍郎巡
撫安徽十六年河決江淮 上知其才命總督河道
兵部尙書治河十年決排疏淪因勢利導使三瀆各
得其所而河以大治卒謚文襄著有治河書十二卷
河上至今設祠祀之柚堂筆談靳文襄過邯鄲呂祖
祠見有題詩于壁云富貴榮華五十秋縱然一夢也
風流而今落拓邯鄲道敢與先生借枕頭墨跡禾乾

追踪其人乃秀水陳天齋也一見遂爲知已天齋名
漢明測量之法復精竒門與文襄爲一人之交凡河
防事宜得失變態並有先見一時河道以下諸員皆
受業爲弟子二十三年五月 上南巡于行在問靳
輔曰爾有何等通今博古之人輔以陳漢對 召見
特賜參議道銜今配饗文襄祠

書畫得父筆法

王世琛字寶傳長洲人明康熙五十一年壬辰狀元
明大學士鏊六世孫父銓字東發丁卯副榜官至禮
部給事中善繪事書法世琛風度恬雅工詩文書畫

得父筆法由修撰遷少詹事視學山左未竣卒于官
是科榜眼歸安沈樹本字厚餘少時 聖駕南巡獻
西湖十景迴文稱 旨探花長洲徐葆光字亮直亦
以南巡獻詩賦稱 旨被取入京是科不第 欽賜
一體殿試五十七年奉 旨冊封琉璃賜一品服撰
中山傳信錄著有二友齋集

好取名士

李紱號穆堂臨川人康熙壬辰庶吉士由編修歷官
都察院副都御史兵部侍郎巡撫廣西總督直隸以
泰河撫田文鏡落職紱爲人矜張愛才若命累掌文

衡好收羅名士以至下第者皆不服如辛丑充會試副總裁頗稱得人入館選者至六十五人之多前此未有也榜後下第者擁紱寓以石碎其門欲剪其鬚北城御史舒庫奏聞以紱不奏聞革職發河工効力復起官 上常以紱爲人問康五端奏言倨詞疾色人畏其鋒雖好取名士却未得財賄 上始釋然命纂修八旗通志所著穆堂初稿五十卷門人四川安居閩撫王恕所訂也

竹雲

王澍字虛舟號篋林金壇人康熙五十一年壬辰進

士選庶吉士改吏部主事歷員外澍以工書名海內有竹雲題跋竹雲者雍正丙午夏南還經淮陰泛珠湖仰見天際白雲如竹十百枝皆具下有雲片若怪石儼然圖畫同行沈凡民曰此先生退老之徵爲作刻章初秀水錢香樹見澍于京邸左圖右史見其積帖至梁梠間斯夕丹鉛辨析窮苗髮不少置戲曰子欲爲張仲楊柯丹邱其人耶澍曰人皆有癖樂此不疲也所著有法帖考正尤爲精覈

壬辰三庶吉

壬辰三庶吉一顧嗣立字俠君長洲人以散館例外

用不就補歸不出著秀野草堂元詩選初二三集注
昌黎飛卿二家詩注一杜詔字紫綸無錫人以養親
歸不出與道士榮連僧天鈞結九龍三逸社選唐詩
叩彈集一程夢星字伍喬取南唐書伍喬居廬山見
星而名不就職歸註李義山詩皆同榜進士

原祁高弟

王敬銘字丹思嘉定人康熙五十二年癸巳狀元授
修撰工畫爲太倉侍郎王原祁高弟是科會元爲歸
安孫見龍

贊見十二兩

溧陽任蘭枝字香谷工制藝未遇時走田埂上遇一
人口啣一刀手持兩刀披髮赤面見蘭枝偃身而過
行半里入喪者之家知爲煞神人卜其必貴後登康
熙癸巳榜眼雍正元年由編修督川學時無學田養
廉奏明諸生贊見以十二兩爲止貧者減半人情悅
服六年陞閣學奉命偕副都御史杭宜祿使安南
國王備龍亭以迎覆命稱旨墮工侍晉禮部尙書
舉人入直內廷

魏廷珍字君璧直隸景州人以李文貞公薦由舉人
入直內廷同王蘭生梅穀成在館充校對官編樂歷

淵源諸書常被 命與大學生李文貞泰酌學習樂律韻學登癸巳探花官至工部尙書

千叟宴詩

吳文簡公襄字七雲青陽人癸巳庶吉士初襄父與一僧善僧來輒留手談僧患足疾坐山中一日其父見僧自外至問之不達徑趨後室跡之內報夫人生子矣由編修官至禮部尚書康熙壬寅襄年六十春二月恭逢千叟宴襄與焉謝恩詩有六句今列千官宴兩榜原登萬壽科之句見片刻餘聞錄

孫文定奏疏

孫嘉淦字錫公號懿齋山西興縣人康熙五十二年聯捷癸巳進士改庶吉士授檢討以直言敢諫受知

世宗雍正四年奉

上諭孫嘉淦居官聲名頗

好着提督順天學政五年前學臣吳襄任滿保舉生員張鎮王澤新劉鵬振朱函爰四名不稱 旨命嘉淦重舉陞刑部左侍郎辦理吏部侍郎事仍兼管順天府尹國子監祭酒事八年庚戌會試充副總裁先是蔚州宗伯李渭湄爲祭酒時彙題名諸碑而鏤之板自明宣德五年林震榜始迄今十有餘年未刻是科嘉淦爲考官又兼司成始續刻以補之旋陞都察院左副

都御史乾隆十年十一月秋審冊內有福建蔣邦齡
致死族匪一案嘉淦力爭以爲不可因上疏曰查舊
例同族之中果有兇悍不法偷竊奸究之人倘事起
一時合族公憤不及鳴官以家法致死報官審明死
者所犯應死與不應死者將爲首者分別擬杖予減
等免抵嗣于乾隆二年五月內據廣督鄂 奏稱舊
例雖屬體順人情但恐朋比串害地方官豈能洞燭
無遺倘民間恃有減等免抵條例相習成風其中難
免冤抑奏請酌刪經刑部律例館議稱族大人衆賢
愚莫辨或以富而招衆怨剛直而致全仇一人煽誘

羣相附和其挾微嫌輒圖報復因而駕捏串害難免
冤抑之處况生殺乃朝廷之大權如有不法自應明
正刑章不宜假手族人以開其隙奏請刪除在案臣
等伏思舊例乃一時劍慾兇悍懼宜之法行之久遠
必滋流弊夫族衆之中愛憎多端或以侮慢招衅或
以慝直生嫌或假義忿以樹己威或借公義以報私
怨一豪強倡論于先衆朋黨附和于後倉猝致怨情罪
難明如一家之中莫尊于祖父母父母其子孫若違
犯教令毆之殺之宜無不可然毆殺則律應滿杖故
殺則律應杖六十徒一年是祖父母父母之于子孫

尚且不得擅殺何況其他再提姦例內卑幼不得犯
尊長犯則依故殺伯叔母姑兄弟律科罪尊長殺卑
幼亦按服律擬誠以倫紀攸關防微杜漸也夫以
朝廷之尊明罰勅法于凡應死之罪人猶合法司詳
加核議至于法無可遣必合二次覆奏 聖天子之
用刑如此慎重奈何任匹夫之好惡操生殺之大權
橫行于一族乎是舊有之例必不可存族匪之條不
須另設于此擬定罪則當臨時參酌虛衷援引務使
輕重得宜方爲允協至所稱族人致死族匪則死者
必有罪之人也其人罪應死者則有本犯應死而擅

殺之條矣不應死而拒捕者則有拒捕格殺之條矣
既殺之者則有不拒捕而擅殺之條矣束縛之勒埋
之者則有已就拘執而擅殺之條矣等語奉 旨交
部議部覆擬今蔣邦齡以卑幼臨時拒捕似應比照
拒捕律減等查拒捕之條內若罪人持杖拒捕其捕
者格殺之及囚逃走捕者逐而殺之若囚窘迫而自
殺者皆勿論若已就拘執及不拒捕而殺之各以鬪殺
傷論本犯應死而擅殺者杖一百又律註以捕亡一
時忿激言若有私謀另議等語律意誠屬詳明律註
更加慎重蓋應捕之人若已就拘執而擅殺尙以鬪

殺抵若有私謀仍分別另議此指捕亡之條而言與
謀故致死族匪不全至族人不法自應鳴官按其所
犯情罪依律究治若預蓄殺機羣相毒謀肆行慘殺
則謀故顯然豈得藉義忿公議之名遂與捕亡一律
科斷而竟無區別乎不惟卑幼不可以此加于尊長
卽尊長亦不可以此施于卑幼且案情百出事難預
定况現在辦理此等案件其中情節果有一綫可原
者或經刑部聲明或奉 特旨量爲寬減如蔣邦齡
律應斬決改擬監候者不一而足又何嘗專任重律
以爲治乎應無庸議奉 旨依議乾隆四年授山東

副總河是年陞兵部尙書直隸總督乾隆四年協辦
大學士卒予祭葬謚文定嘉淦立朝剛直多面折廷
爭不避權貴天下想望丰采故乾隆初年有匪人託
嘉淦名作假疏後得其人置于法

時文

上海蔡嵩康熙癸巳進士雍正初年由編修督學雲
南奏請時文以黃淳耀爲宗刊示士子 上諭云朕
殊不以爲然復又奏請以唐順之易之而以 本朝
熊伯龍韓菼添入 上又諭云此二臣文名固不待
言但古人已往後人尙有偏私之論何況 本朝人

物即汝自爲猶可不便批定也

嚴禁那帑捐官

向日貞字一存成都人康熙癸巳進士改庶吉士授廣東道御史因捐納例開各官多私那國帑捐陞納職因而虧空雍正元年上請嚴禁那帑捐官疏曰國用資于錢穀錢穀寄于有司州縣責成首嚴虧空乃有不法之員視捐款爲倖進之階借國帑爲營私之具聞開捐例百計求成權移公帑暫遂私謀先用卽用爲自己而捐陞盈百盈千爲子弟而納職而又巧于奉迎工于趨奉上司素受其重賄臨時顧惜其私

情曲爲徇庇轉接後人陞者居于局外旣謝責而不擔受者墮其術中雖後悔而莫及卽新任亦有剛常堅詞不接乃上司啣其夙怨必至中傷乃如之人上虧國帑下累後官貽害甚于盜臣侵蝕工于鼠竊請著定例嚴加處分上司有隱護之員無論離任現任令其賠補子弟有捐納之職不拘先用後用革其職銜如此則徇庇可除舊官無巧脫之計虧空可出離任無掣肘之虞矣奉旨交部議如所奏行先是科場停止鄉會試錄是年復奏自癸卯科始仍請刊行日貞以通籍後避諱改名日正少有神童之目制藝敏

捷出黃際飛越之門所刻有程墨大小題文憲蜀中
論時文者必首稱焉見例案全集

摸龍阿太孫

仁和姚三辰康熙癸巳進士由編修官至吏部侍郎
相傳三辰祖以外科世其家常採藥持藍人呼爲姚
藍兒一日採藥歸醉墮西溪以手摸石旋卽有漩蠕
蠕而動負姚而上驚以爲蛇回視兩目如燈照見鬚
角委姚地上騰空而去始知乃龍也兩手觸漩處香
數月不散以之撮藥應手而愈故人呼爲摸龍阿太
每愈人病不受謝孫官二品人以爲陰德所感云

兄弟同榜翰林

長洲李錦字炯文康熙五十四年乙未會元由編修
官至侍讀弟文銳字鼎臣同榜傳臚由編修官至司
經局洗馬兄弟同榜同翰林

乙未甲弟兄

康熙乙未狀元徐陶璋字端揆長洲人官修撰兄
模字文表茂進士榜眼繆曰藻字文子吳縣人
官洗馬弟曰芑字武子雍正癸卯進士官編修探
花傳玉露字良木會稽人編修弟王雲字孔木丙辰進士皆有名
墨竹

歸安吳應棻榜名應楨以避諱改名字小肩康熙乙未進士工詩好寫墨竹嘗于扇上寫竹石小景錢銀臺居敬見之題云澹烟濃墨掃雲腴胎脫東坡鳳尾圖又見蟹爬沙滿紙千秋一炷屬菱湖菱湖應棻所居也晚自號青靈山人官至工部侍郎湖北巡撫

興利除弊

成文康熙五十四年乙未進士改庶吉士授編修滿洲人雍正元年正月引見妄奏上以爲不知所陳何語暨令諸翰林各據所知條奏成文摺內有興利除弊等語上以皇考治人有何弊朕何以除

之又奏請八旗十五歲以上俱令讀書如此則挑取護軍復用何人又復懇辭教習二十阿哥之職可謂狂妄胆大着革職跟隨二十阿哥行走若改過則已不必鎖拿監禁

戊戌會狀

康熙五十七戊戌狀元常熟汪應銓字杜林官至贊善會元則嘉善楊爾德也庶吉士改給事中視學廣東

河南學政養廉

康熙戊戌榜眼桐城張廷璐字寶臣大學士英第三

子督學河南除夫馬取給地方外其幕友束修家口
養贍俱無所出 上聞之問其冗戶部尚書廷玉遂
以實對 上命河撫田文鏡酌給盤費文鏡議夫馬
自不便取給地方以至派累議每歲夫馬銀一千六
百兩幕修銀一千兩養贍家口銀一千兩供給雜用
銀三千兩每歲六千六百兩三年總需銀二萬兩故
河南學臣養廉較他省獨優自文鏡爲廷玉弟廷璿
始也

學政告病

仁和沈錫輅康熙戊戌探花提督山西一年餘以患

病解任

幾釐之失

錢塘徐本康熙戊戌庶吉士授編修歷官至安徽巡
撫雍正七年奏報各屬麥收分數有幾分幾釐之語
上諭云不知所謂幾釐者如何見之甚覺可笑傳
旨申飭本復具摺請罪 上諭幾釐之失尙爲小
過無非欲汝務實爾官至工部尙書大學士
布衣奉使

孫致彌字愷似號松坪嘉定人明登萊巡撫火東公
之子康熙初靖南王三世子倭囉額福耿者木木中

承舊禪也能詩嘗與致彌唱酬因言于上 上方命
御前大臣採訪朝鮮文獻致彌以布衣賜一品服臨
軒策遣從往士論榮之奉使詩有甘父漫教從博望
馬周只恐負常何謂噶烏兩侍衛及正公太保也戊
戌始登進士改庶常入直 內廷假歸又以民爭復
漕事罷旋得釋補散館授編修官至侍讀學士卒于
京有杖左堂集六卷

聊城二狀元

康熙六十年辛丑狀元鄧鍾岳字東長號悔廬聊城
人聊城自丙戌開科傳以漸後鍾岳繼之一縣二狀

元亦盛事也工書法友愛諸第或暮歸過時必俟于
門諸第不敢夜出大魁後同年百七十餘人無一不
浹洽欵曲朝議推重之乙卯江南副主考隨督學江
南著有寒香閣集是科榜眼爲福建長樂吳文煥探
花爲河南上蔡程元章字冠文官至尙書雍正九年
總督浙江 上命效法李衛而元章事事與衛齟齬
人服其剛直

再開浙江鄉會試

王蘭生直隸交河人以李文貞公薦與魏廷珍梅穀
成入直內廷編纂律歷淵源康熙六十年辛丑不第

欽賜舉人一體殿試二甲一名改庶吉士授編修
四年海寧查嗣庭案起奉旨停浙江鄉會試特命
蘭生督學浙江閱三年蘭生奏士風丕變上諭准
其照舊鄉會試官至閣學

八仙會

黃之雋字石牧號唐堂華亭人薦舉博學鴻詞康熙
辛丑二甲二名庶吉士在館日聚同巷八人為八仙
會以杜甫飲中姓氏為上八仙人取其一以自署又
以世俗所傳鍾離權呂巖輩分署之為下八仙彼此
上八仙呼此以下八仙應故為參錯不得呼姓字呼

年兄呼者罰由編修至中允提學福建鐫級歸不出
優游林下十餘年卒著有香屑集十八卷皆集唐人
句為香奩詩凡古今體九百三十餘首對偶工整渾
若天成而一一如自已出可謂前無古人後無來者

元宵聯句

錢香樹先生諱陳羣嘉興人康熙辛丑庶吉士授編
修官至刑部侍郎在籍食尚書俸先生早歲以詩名
亞于長洲沈德潛天下稱詩者必歸二公自館選後
受知今上凡聖駕南巡御製詩俱寄沈與先生
賜和墨典也先生舊宅在金陀坊先大夫石亭公令

秀水時予以諸生隨任命受業門下時值戊寅 聖
駕南巡名試諸生題爲春蠶作繭先生命予擬作余
有不校還自織非彈却成丸句先生閱之驚喜云昔
年曾侍 上于乾清宮元宵聯句 上思如湧泉言
言珠玉僕得一聯云風團謝家絮霜點洞庭橙一時
王公大臣皆推僕爲五字長城固不敢當今見足下
丸字韻一聯與前事足相印證也他年成進士入翰
林聲名雀起余曰望之後予以癸未入翰林先生祝
萬壽來京年已七十矣見之甚喜曰吾言固不謬
也謚文端樹齋集十卷大司農汪由敦謹堂序

辛丑多名臣名儒

康熙辛丑科名臣名儒多出其中官尚書者一秀水
錢陳羣官侍郎者二鄞縣邵基勵宗萬官總督者二
上蔡陳元章冠文平越王士俊灼三巡撫者四新喻
晏斯盛一齋滋陽喬世臣丹葵安居王恕中安正白
旗漢軍孫國璽名儒則會稽魯曾煜啟人秋肸孝感
夏力恕宜興儲大文六雅閩謝道承又紹金谿馮詠
夔颺歸安陸奎勳陸堂皆是科庶吉士也

硃批謝摺

湖北巡撫王士俊貴州平越人雍正十年八月 上

賞士俊花屯絹蜜荔枝士俊謝招有云縫衣有耀頂
踵皆被龍光懷核親嘗肺腑長含玉液 上覽之批
云衣只被身何及頂踵核豈足嘗難入肺腑人皆以
爲笑論者謂幕賓所爲而士俊亦失檢云

庶吉士撰文

黃之雋工詩尤長于古文辛丑會試總裁大學士時
爲吏部尚書遂寧張文端公大學士時爲戶部尚書
陽城田文端公戶部侍郎儀封張清恪公副都御史
臨川李公穆堂黃之雋中二十七名同考檢討全州
蔣綱檢討新安李 璐時各總裁有五策通場第一

之評臨川謂曰儲大文張符驥馮諷輩策俱佳至于
章局勻練起伏轉折得古文之法唯子爲備殿試第
二甲第二名選庶吉士查中翰雲標預慶之雋中四
十五名鄉榜發不驗及合三試而名數適符 康熙
後壬寅歲十一月十三日 聖祖仁皇帝升遐二

十日 世宗憲皇帝即位大禮鉅典例由翰林編
檢以上撰文長院靜海勵文恭公詢於青陽吳文簡
公日記新庶常有一善四六文者吳曰華亭黃之雋
乎公立傳之雋授數題每奏多稱 旨庶吉士撰文
自此始于是同年平湖陸坡星奎勲嘉興錢香樹陳

羣繼之時之雋雍正元年七月奏呈中元祭 聖祖文大稱 旨次日 召見養心殿 賜貂出投職編修他日 上命檢檔案凡撰文稱很好稱好者列名給賞時陳編修萬策鄧修撰鍾岳陸錢二庶常皆賜內府緞一匹之雋得二匹八月元 日講官起居注凡一月遇 聖祖祔主太廟乾清宮早朝兩大禮侍班躬覲其盛有 詔重修明史用纂修官二十人之雋與焉引見西暖閣奉 旨以中贊即用九月 特簡提督福建學政

淡墨錄卷九

蜀綿 李調元 雨村

甄別翰林

雍正元年二月 上諭大學士張鵬翮尙書田從典徐元夢朱軾侍郎張伯行李紱會同滿漢掌院學士將翰林詹事府官員有結黨營私援引請託每遇科場通同作弊者甄別勒休

迴避卷

雍正元年 特恩加科有因迴避考官不會應試者派大臣擬題奏請候 上黜出於內閣考試是科鄉

試畢 上特派大學士王頊齡尙書勵廷儀吏部侍郎史貽直戶部侍郎張伯行李周望兵部侍郎阿克敦副都御史李紱同南書房翰林檢閱落卷

南書房

雍正癸卯狀元金壇于振榜眼上元戴瀚探花湖廣鍾祥楊炳 上以登極恩科應格外施恩俱著在南書房行走特恩也

論題用孝經

聖祖時鄉會試二場以孝經爲論題後改用太極圖說通書西銘正蒙雍正元年 上以宋儒雖足羽翼

經傳不若聖言之廣大悉備本年會試二場論題宜仍用孝經

男三號

周學健江西名士癸卯鄉試題爲學而優則仕一節文思幽奧房考張不能句讀怒而批抹之歸寢忽嚙語自批其頰曰如此佳文而汝不知尙忝然作房考乎家人以爲中風急呼各房考檢視之見所抹卷乃曰試薦之何如時正主考爲禮部侍郎任蘭枝閱而驚曰此奇文通場所無可以冠多士也副主考德公方假寐凡上伺其醒告之德問何字號曰男字第三

曰不必闕文竟定解元可也任問故曰我寢方酣忽見金甲神向我賀曰汝第三兒子中解元矣今果男三號非其驗乎榜定後衆問張房考曩語茫然不知也

指頭畫

奉新帥念祖字德宗工制藝與周學健齊名工畫以指頭墨作花草間寫山水俱有逸趣

監臨考房官

向來各省鄉試房考凡州縣官由科甲出身者只許入闈一次雍正元年五月奉 上諭考官鑒拔爲主

何論曾否入闈嗣後凡遇鄉科各省督撫臨場調齊科甲出身之員不論已未分房監臨試以時藝一篇其文理優長者爲內簾房考荒疎者供外場執事

湖北湖南分闈鄉試

雍正元年七月奉 上諭湖南士子赴湖北鄉試必由洞庭湖六七月間風浪尤險間有覆溺之患着分湖北湖南兩闈考試卽於明年預備場屋

奴才

八月十六日兵部尙書舅舅隆科多奉 旨大臣亦稱奴才奴才亦稱奴才此兩樣不好嗣後凡啟奏俱

進士不限額數

癸卯九月會試禮部請定取中進士名數 上定一百八十八名仍諭總裁朱軾張廷玉此外不拘省分不限額數有可取佳卷選出另行具奏

編檢挑選府道

康熙時編檢多至二百人庶吉士五六十人今尙有百數十人 上恐人才置之閒散思多方錄用雍正元年十月奉 上諭著內閣大學士會同掌院學士秉公擇其學優工書善翻譯者留館辦事修書外其

或才具練達可當科道吏部之選或長於吏治編檢可爲府道庶吉士可爲州縣者一一分別具奏

殿試賜火爐

向例殿試進士在丹墀癸卯年十月二十七日殿試時天寒硯冰 上特令移太和殿內兩傍並令太監多置火爐令殿內和暖使諸貢士得盡心作文寫卷世宗之優待讀書士子如此

傳臚榜下授職

癸卯殿試 上以元年特開恩科所拔狀元于振等應格外施恩並二甲第一名張廷珩卽授檢討俱著

在南書房行走並 命派隆科多張廷玉張伯行登
德檢選務得文行兼優之士擢爲庶吉士除四人外
又選沈淑等五十七人從前未有也是科各臣如尹
文端公繼善陳文定公宏謀皆在選中

晚香園

尹文端繼善字望山鑲黃旗人由翰林歷官至兩江
總督大學士士民愛戴暇則同幕客袁枚輩詩酒唱
酬至今猶想其丰度入閣後 上賜邸第內築晚香
園日夕讀書其中 乾隆二十九年余爲庶吉士適
公爲大教習有晚香園詩用杜甫何將軍山林十首

韻命諸吉士和予詩有園同司馬樂人比潞公清句
蓋園名用惟有黃花晚節香而名故以溫公獨樂與
潞公比之紀其實也

訛判

陳文定公榕門廣西臨桂人由翰林歷官江蘇巡撫
兩廣總督吏部尙書大學士生平言行不苟喜讀朱
子各臣言行錄慕司馬光爲人嘗刻家傳集行世先
是幼時扶訛判云人原多道氣吏本是仙才果如其
言著有訓俗遺規等書

朝考之始

雍正元年十一月二十九日奉 上諭新科進士于引見前朕欲先行考試再引見一應仍照殿試預備朕將詩文四六各體出題視其所能或一篇或二三篇或各體俱作悉聽其便此卽今朝考之始也

奏摺草行

郟陽張大有康熙甲戌庶吉士雍正二年爲漕運總督奏言寫字手顫請奏摺代書 上諭云忙時令人代書亦可若密事仍須親寫卽字畫粗大畧帶行草亦屬無妨辭達而已敬不在此

一不安靜

上諭編修萬承蒼從前科場作弊招搖今春鄉試前又不安靜着革職其弟庶吉士承芴亦歸進士班選

考差之始

雍正三年 上諭各省學政與正副主考朕皆就其爲人謹慎者派往並未考試文藝其中竟有不能衡文者此皆由中式後荒疎年久故耳着將應差翰林並進士出身各部院官查奏俟朕試以文藝再行差委

事類曹鼐

直隸安州陳惠華雍正二年甲辰狀元未遇時每至

之處必書明曹鼐不可一條人不解其意或聞公少年時讀書靜室曾有東隣之窺公正色拒之事類曹鼐果登大魁免袖堂筆談官至禮部尙書是科榜眼高郵王安國探花錢塘汪德容

白海棠

靜海尙書勵文恭公杜訥立朝端凝蔚爲人瑞雍正壬子卒櫬車還里第中有公植海棠當秋吐花色變編素人咸異之門人梁溪鄒編修畫爲圖皆有題詩
劾張姚二姓疏

諸城劉文正公統勳字延清雍正甲辰庶吉士檢討

入直內廷累官都察院左都御史立朝剛直人多憚之時桐城張姚二姓布滿中外大學士張廷玉聲勢赫奕文正統勳上疏曰大學士張廷玉與伊戚前姚文然本係巨族科第漸多仕宦實盛至今各登仕籍者有張廷璐等至于姚氏之在桐城則有姚孔鋹以上數十人臣聞 聖祖仁皇帝時曾飭廷臣中有陞遷太速之 旨特諭停止陞轉原任大學士王熙之孫王景曾亦在其內臣以爲宜倣此意將張姚兩姓部冊有各者親房近支累世密戚現在之員開列奏聞三年以內除 特旨陞用外其餘一槩停陞遇

有參罰照例參革奏聞 上交部議吏部覆奏臣部
官冊所載張姚兩姓出仕各員與左都御史所奏詳
加核對張姓在京官員侍郎張廷璐編修張若需主
事張機張若宜中書張筠外任官員浙江布政使張
若震福建龍巖州知州張廷球湖南茶陵州知州張
廷琛貴州鎮寧州知州張若赤直隸安東縣知縣張
鴻疇山西曲沃縣知縣張若荃山東泰安縣知縣張
廷瑚其姚姓仕者江南淮徐道姚廷棟廣東惠潮道
姚孔鈺山東曹州府知府姚興賓浙江杭州府知府
姚淮署直隸大名府通判姚孔廡河南中牟縣縣丞

姚孔鉞貴州黃平州州同姚孔鎧廣西恩州府經歷
姚興謨其原奏未經叙入部冊有名有河南祥符縣
縣丞姚孔鐸江南元和縣縣丞張曰謨以上張姓出
仕者十三員姚姓出仕者十員惟姚孔鈺係大學士
張廷玉之甥孔鏗係張廷玉之壻臣等核其陞轉在
京侍郎在外司道知府多由 特旨簡用亦有督撫
保題陞用之員或因大學士張廷玉爲 皇上簡用
大臣本人稍存矜肆之念該管上司或有瞻顧之情
亦未可知臣等酌議將張姚現任之員開列名單行
文在京各部院在外各該督撫令其察看嗣後除臣

部論俸仍應照例陞轉外如有才具優長應行保題者應於摺內將該員係大學士張廷玉親戚之處聲明與臣等確查該員歷俸深淺是否合例處核覆具奏如不能稱職亦令據實糾參務一秉至公不得稍有瞻顧庶舉措咸得其平而本人亦愈加謹慎矣奉旨依議一時朝議翕然服其不避嫌怨

公祭文正

諸城相國乾隆二十八年署陝甘總督時伊犁用兵上諭督理糧儲大將軍兆惠方銳意進取而軍糧以路遠遲滯奉旨劉統勳着革職發往軍前披甲

若以爲士可殺而不可辱欲來京甘就典刑亦惟其所願旋伊犁平定復還原職歷東閣大學士總理吏部四十二年夏早朝五鼓乘轎至東華門從者請降則已端坐轎中而通鼻垂玉箸長尺餘戶部尙書額福福隆安奏聞上震悼輟朝即日聖駕親至東直門驢車賜邸撫屍大慟時子墉官江西糧道陞按察未歸撫其孫慰之諸大臣勸上迴蹕上登輦哭至乾清門又哭謂軍機大臣曰朕失一股肱矣

汪文端書法

汪由敦字師茗休寧人幼穎異讀書目數行俱下初

名良金十歲就試來售改今名嶽人商杭者令甲別立商籍由敦年十九遊浙中循例入試補錢塘縣學附生故又爲錢塘籍時徐元夢撫浙江聞其名延致幕中繼元夢入爲工部尙書由敦以國子監生偕入都雍正元年疏薦引 見充明史館纂修官故事史局編纂例用詞臣由敦以諸生被 命時論榮之二年三月舉順天鄉試八月成進士改翰林院庶吉士散館授編修 皇上初卽位授提督四譯館太常寺少卿仍兼講官館卿向無兼記注者由敦以文學夙爲 上所知故有是 命乾隆元年入直南書房授

內閣學士六年授兵部左侍郎八年充經筵講官轉戶部授工部尙書轉刑部十一年兼署都察院左都御史旋入直軍機處丁卯金川方用兵 皇上睿謨廣運指授方畧日數千百言由敦視草援筆立就無不當 上意十四年金川平加軍功三級旋加太子少師協辦大學士俄以代原任大學士張廷玉陳奏事革職留尙書任視河十五年四川學政朱荃以墨敗由敦曾舉荃典試復革職仍理兵部侍郎事自贖十六年補戶部右侍郎復奉 命勘永定河時積水爲患有言宜別開新河歸海者由敦徧歷沿河州郡

度地形勢議以暴水爲患由河身淤淺葦濬之當自
息別開新河未見其利日久復淤無益又當壞民田
廬無算宜仍舊便奏 上報可十七年授工部尙書
十九年加太子太傅兼理刑部事敘平準噶爾功得
軍功加三級自準噶爾出師以來由敦儲同事諸臣
晨夕進見日數四時或扈從 召對帳殿亦如之二
十一年轉工部二十二年轉吏部尙書二十三年正
月卒于官年六十七諡文端由敦學問淹貫於書無
所不窺爲文章典重有體官翰林 朝廷大制作必
屬之一時奉爲矜式其他碑版序紀及古今體詩俱

爲時所傳誦著有松泉集二十六卷尤嫻歷代掌故
前後考定樂章祭器鹵簿及朝會升禘諸大禮皆斟酌
古今釐然爲一代制爲人沉靜寡言笑喜愠不少
見於色遇事有識默定于中不以議論捷給相尙當
羣言紛沓徐出一語聞者厭心以爲不可及也氣度
端凝整暇極倜傥中亦從容不失條理卒 皇上親
臨其喪哭之慟 賜陀羅衛以殮賞內庫銀二千兩
經理喪事由敦尤工書卒之後 皇上命袁輯勒石
凡十卷筆法深穩端勁如其爲人見錢維城所撰本
傳

淡墨錄卷十
重開浙闈
雍正六年李敏達公衛為浙撫同學政王蘭生及王國棟先後奏稱兩浙士子感恩悔過痛自改除奉旨七月屆鄉試之期浙省士子仍准照舊鄉會考試
硃批旁註
雍正初 上覽章疏及內外臣工奏摺皆隨閱隨批若遇軍機要事咸與廷臣商酌詳細批明多有子摺內旁註者堆積甚多莫不硃批滿紙竟有欲辦事而

淡墨錄卷十

重開浙闈

蜀綿 李調元 雨村

雍正六年李敏達公衛為浙撫同學政王蘭生及王國棟先後奏稱兩浙士子感恩悔過痛自改除奉旨七月屆鄉試之期浙省士子仍准照舊鄉會考試

硃批旁註

雍正初 上覽章疏及內外臣工奏摺皆隨閱隨批若遇軍機要事咸與廷臣商酌詳細批明多有子摺內旁註者堆積甚多莫不硃批滿紙竟有欲辦事而

無事可辦之時不少暇豫如此

戒急用忍

雍正丙午 上與朱綱言 聖祖賜朕眼鏡朕眼目

原不似今精明是 聖祖升遐之時因痛哭出涕

較少時反覺倍好似此人言哭多傷目之論未確彼

時朕在養心殿辦理政事坐卧不離此處者三年而

三年內每遇暑天未有如此殿之涼者朕曾蒙

聖祖慈訓戒急用忍故殿中扁額即用此四字仍敬

書 上諭二字於上東暖閣扁額取惟仁二字對聯

云諸惡不忍作衆善必樂爲西扁額取惟君難三字

對聯云原以一人治天下不以天下奉一人 上嘗

云宰殺耕牛是必用禁有謂菜牛不能耕地止可屠

宰者殊不足信如教以耕地調馴精熟焉有不能耕

地之牛網雲南巡撫也

爲神所弄

雍正丙午江南鄉試其時聘近省甲科司分校事有

張壘者科分久自居前輩每晚焚香拜祝神佑如有

陰德求暗中指授各房笑其癡相與弄之折一細竿

伺其燈下閱卷有所棄則于窗外以竿挑其冠壘果

驚以爲神拜如前求示衆房復以竿挑之壘遂不復

閱直捧卷上堂時主考爲沈近思已寢矣壘叩門求見告以神明指示之故近思閱其卷笑曰此文甚佳取中有餘君何必神道設教乎衆房噤不敢言及榜發此卷已在中中各譁然告壘曰我輩弄君耳壘正色曰此非我爲君等所弄乃君等爲鬼神所弄耳人亦折服

一點紅

彭啟豐字翰文長洲人雍正五年丁未會狀官至刑部侍郎轉禮侍告假歸值鄉民有侵田構訟者出券約爲証原中係公名蓋公爲諸生時事也縣令不察

遽出票拘之公于票尾書一絕令役持去有自從

御筆親除後又被琴堂一點紅句令大慙親登門謝焉是科榜眼爲福建德化鄧啟元探花爲江南通州馬宏琦

小山花卉

鄒一桂號小山無錫人丁未進士改庶吉復改御史歷官至內閣學士兼禮部侍郎工花卉分枝布葉條暢自如設色明淨清奇治豔暉南田後不僅見也

詩畫敏捷

張鵬翀字天屏號南華嘉定人性穎異讀書如宿習

雍正丁未進士改庶吉士授編修鵬翀天才敏捷在館時賦雁字詩日未晡成七律三十章兼工畫掇同于詩乾隆二年丁巳御試乾清宮是日衆詞臣晷日未亭午有投卷者曰必南華也果然先是上天縱多能文不加點詞臣中罕可廩和者至是心賞之取高等官至正詹畫徵錄云南華山水師元四家尤長倪黃法雲峯高厚沙水幽深筆清墨潤兼有麓臺石谷之風洵畫家之後勁也

丈量蜀地

雍正六年二月奉旨查丈四川地畝欽差給事高

維新馬維翰御史吳鳴虞吳濤及庶吉士中書各員到川會同巡撫憲德分掣地方協同四川四道丈量鳴虞掣丈成都松茂道維翰掣丈建昌道濤掣丈川東道維新掣丈永寧道維新維翰先丈完嗣因鳴虞苛索每畝五釐弓算手及家人分得又受刁民劉宗漢賄八十兩囑將新都縣前明大學士楊廷和墳墓祭田越界侵佔物議沸騰撫奏革職命維新重丈維新卽親往潼綿處明白開示漸次清丈人心悅服而濤丈川東重夔保順四府地本遼濶濤性稍鈍夔州萬縣百姓聚衆稱丈量不公扯旗申訴又命維新復

文密拿爲首懲治閏七月四路告竣未幾吳濤亦被
奏奉 旨以高維新補授四川布政使馬維翰署按
察使憲德保薦也未幾以條奏不稱 旨皆奪職去

陝西土語

陝西鄉試署驛鹽道佟鑿戲用陝西土語作頌聖表
文借以譏訕陝西士子經巡撫碩色以科場重地玩
視大典妄肆訕笑奏部議照捏造訛言刊刻傳
播杖一百流二千里例奉 旨依議雍正十三年事
也

乙字

乙卯四川鄉試二場內簾交出主考官表題內寫凡
有條奏悉乙夜披覽俱擡頭寫時提調官爲鹽驛道
顧贊傳諭士子不用擡寫以至通場悉字下一槩將
乙字塗改顯涉疑竇撫臣題奏罰俸一年其奏疏云
如果錯悞例應稟明傳進內簾改正況非錯悞何得
擅改輕率之咎誠不能爲顧贊寬也

生員條陳時事

雍正六年山東濟寧州廩膳生員陳梈條奏查科場
主考官官專司閱卷至監臨提調監試等官各有外
簾執事原無先閱試卷之例誠恐于交卷時隨手翻

閱或有指示改正字句等弊亦未可定 上交部議
如所請行以生員得條奏時事亦異數也

不念祖父

雍正六年四月直隸布政使張迺按察使魏定國夾
死竇相可都御史奏請正法 上以迺係原任大學
士張玉書之子不念祖父本應照擬但念張玉書一
生小心謹慎効力多年從寬免死發回原籍交地方
官管束

戲不禁

雍正六年李鳳翥奏鄉邑之中共爲神會歛錢演戲

奏請禁止六年三月魏廷珍奏將違禁演戲之保長
各杖八十發落奉 上諭村堡之間豪強地棍借演
戲爲名歛錢肥已開設賭場鬪毆生事此則有司所
當嚴禁至于有力之家祀神酬願歡慶之會歌咏太
平在民間必有不容已之情在國法無一槩禁止之
理今但稱違例演戲而未分晰其緣由則是凡屬演
戲者皆爲犯法國家無此科條也如賭博一事應行
嚴禁者而省會之地公然市賣賭具尙不能覺察豈
有將民間不能禁止而國法所不曾禁止者一槩入
于禁止之例此欲徒存其名乎抑果將踐其實乎恐

問之督撫大吏亦無以自解也將此通行曉諭知之
應試舉子不盤查

雍正六年七月二十六日 上諭內務府總管常明
于蘆溝橋蓋造官房令赴京應試舉子無盤查行李
之擾並令崇文門查稅官員嚴飭巡役毋得借端稽
留額外苛索

子保舉父

是年 命諸臣各保舉一人有內舉不避親之義雍
正六年九月衡永郴道汪櫛保舉其父原任刑部司
官汪灃學問政事久切留心忠愛之性出于至誠

上卽命補授四川叙州府知府

皇城草詩

顧成天字小厓江南婁縣人以應試舉人寓京官宗
人府府丞蔡嵩宅中雍正七年閏七月二十日嵩因
帶宿醒未解奏對于 御前稱王爲王爺因草職掣
問恐有悖逆字跡隨命搜查尙無不法詩詞內檢出
顧成天詠皇城草詩隨呈 御覽上見其寓意似有
感憤譏刺之心因命人詢問蔡嵩成天平日有無詩
文著作于是查出刻詩一冊中有 聖祖輓詞六
章詞意悲切 上覽之淒然墮淚謂大臣曰彼未登

仕籍之人而懷感恩戴德之誠如此則其秉性善良
居心忠厚可知其皇城草一詩乃別有所寄託為不
如已意之人而作也著行文江南督撫將顧成天送
京引見朕有錄用之處隨于八年送至京師是年庚
戌科會試甫過 上欽賜為編修列名入于是科庶
吉士之列人皆以為罕見之奇遇云官侍講 今
上為太子時伴讀書焉蔡嵩康熙癸巳進士上海人
三開甲皆浙江

雍正八年庚戌三鼎甲皆浙江狀元周霽錢塘人榜
眼曾元沈昌字秀水人探花梁詩正字薌林亦錢塘

人而官至大學士

土地伺候

蔣文恪公溥號恒軒常熟人文肅公之子雍正庚戌
進士官至大學士少時讀書平臺每喚人輒有應聲
而無人至一夜欲溲窺外月不甚明呼所隨僕但應
而不入啟戶見一人方枕牆門以頭向內而應初疑
僮醉罵之如故怒欲朴之見所卧人長三尺方巾皂
服白須如世所塑土地公喝之乃冉冉而沒人以爲
土地伺候以是知公必大貴至是果大拜賜第李廣
橋文恪工花卉得其家法隨意布置自多生趣供奉

內廷畫幅歲時經進云

張文和辭子鼎甲

雍正十一年癸丑殿試四月初一日大學士尹泰等將策十卷進呈上閱至第五本字畫端楷策內公忠體國一條云僚采之際善則相勸過則相規無詐無虞必誠必信則同官一體也內外亦一體也文武亦一體也廣而至於百司庶司何莫非臂指手足之相關也此則純臣之居心可以不負千載一時之遭逢而贊襄太和之上理數語極爲懇摯頗得古大臣之風因拔置一甲三名諸臣稱爲允當及拆號乃大

學士張文和之子張若靄上心深爲嘉悅諭諸大臣曰大臣子弟能知忠君愛國之心異日必能爲國家抒誠宣力大學士張英立朝數十年清忠和厚終始不渝張廷玉朝夕在朕左右勤勞翊贊時時以堯舜期朕朕亦以臯夔期之張若靄稟承家教兼之世德所鍾故能若此非獨家瑞亦國之慶也因遣人往諭張廷玉張廷玉再三懇辭云普天下人材衆多三年大比莫不想望鼎甲臣蒙恩現居政府而子張若靄登一甲三名占寒士之先於心實有不安倘蒙皇恩名列二甲已爲榮幸之極上云汝家忠盡積

德有此佳子弟中一鼎甲亦人所共服何必遜讓張
 廷玉跪奏云 皇上至公諸臣亦無私曲以臣子一
 日之長蒙 恩拔取但臣家何等恩榮未備只算臣
 情願讓與天下寒士求 皇上憐臣愚衷若君恩祖
 德佑庶臣子留其福分以為將來上進之階更為美
 事陳奏時情詞懇至 上乃勉從其請將張若靄改
 為二甲一名即以二甲一名之沈文鎬改為一甲三
 名狀元陳倓儀徵人即會元也榜眼田志勤大興人
 文鎬崇明人

晴嵐花草

秀水張庚云晴嵐善書兼工花草嘗見其折枝荷花
 數色穠郁清艷而寫葉純以墨染亦舊法也惜早世
 未得大用錢坤一云晴嵐畫誠佳第每幅若有未完
 者此所以不永年歟晴嵐張若靄字

東山山水

董邦達字孚存號東山富陽人癸丑進士改庶吉士
 由編修官至吏部右侍郎取法元人善用枯筆勾勒
 皴擦多逸致近又泰之董巨天姿既高而好古復篤
 自然超軼深為 上所賞識

王清本

沙黑錄
祁陽陳文肅公大受字可亭雍正癸丑庶吉士由編
修歷官至大學士子輝祖官湖北巡撫葬文肅于祖
塋卜有日矣其弟中書繩祖夢有持帖來拜者曰河
神王清本十二人也驚而寤次日到墳伐其樹之礙
路者樹文有王清本三字數之十二枝也遂命停斧
異日問內閣侍讀嚴長明云五色線載河神明王清
本輝祖後調浙撫以前撫王亶望案得禍繩祖官
至廣東糧道

勵宗萬

勵宗萬靜海人大學士之孫雍正辛丑進士選庶吉

士時年甫十七 上深愛之雍正六年提學山西卽
密奏監生梁開宇家貲億萬與族兄爭控產業訖候
補道侯琰與按察蔣炯從中說合分肥斷令給原告
銀三萬兩奏聞 上嘉之治炯琰等罪遂陞國子監
司業留任並 諭曰汝少年輕率甚不謹密凡所密
奏人皆知之如梁開宇之事通省皆知係汝密奏豈
特深負朕恩亦乃速禍之道臣不密則失身君不密
則失臣朕斯諭當書諸紳以爲終身誦

看驗不跪

馬觀察維翰字墨麟嘉興人康熙辛丑進士貌不逾

中人而抱負甚大榜下內大臣看驗時諸人皆跪維翰不可九門提督隆科多呵之維翰不動隆轉笑曰不料渺小丈夫乃風骨如許維翰曰區區一跪尙未見維翰風骨也隆大奇之改部郎擢工科給事中雍正六年奉命偕給事中晉寧高維新壬辰庶吉士御史吳宗虞吳濤至蜀分四道丈量田畝擢建昌道忤總督某直揭部科被逮入都上登極授江南常鎮道詩與盧雅兩齊名人稱南馬北盧

孔孟指使

謝濟世字梅莊廣西全州人康熙壬辰庶吉士改御

史三日卽奏劾河東總督田文鏡世宗疑有指使交刑部嚴訊濟世稱指使有人問爲誰曰孔子孟子問何爲指使曰讀孔孟書便應盡忠直諫上憐其直謫軍前効力時雍正丙午十二月初七日也今上登極赦還職濟世疏求外用授湖南糧道長沙人士感其遺愛片紙隻字俱珍重之而獄中和東坡詩甚傳

旗員擅出例

雍正七年三月兩江總督尹繼善奏滿洲革退翰林車松于二年五月從京起身到揚州會拜鹽道朱一

鳳隨往浙江理事同知車箱衙門留住數月又往拜
湖州府知府唐紹祖備盤費送蘇州與原任翰林陳
恂在虎邱飲酒盤桓十數日由揚州僱車回京上
嘉之諭 聖祖時松以浮躁革職修書議敘刑部
主事又革任家居今未向本旗告假擅自出京遍遊
江浙于謁地方甚屬可惡革職拏問自此旗員如擅
出者俱照例議松康熙己丑庶吉士一鳳涿州人紹
祖江都人皆松己丑庶吉士同年也恂亦甲辰庶吉
士

學政秉公

提督四川學政周人驥于雍正八年十九日題叅江
油縣教諭陳幹爲伊子陳鵬萬請托入學奉 旨陳
幹着革職並 諭與從前川北道王棠之叅奏魏繹
皆能秉公執法不顧情面交部議敘繹乃順治初年
任刑部尙書象樞之孫也 上以公正大臣之後是
以 特旨由部改御史陞通政叅議並所舉胞弟綬
在刑部行走俱着發回籍令該督撫察其子孫擇其
端方謹慎者保舉

捏造

雍正七年 上念張文端公小心謹慎効力有年所

有應追賠銀十萬兩經 部奏請將其子給事中張懋誠解任追賠 上命豁免八萬止追二萬不必解任八年五月浙督李衛奏春間有原任河上通判張鵬飛來杭謁見詭稱同鄉御史嚴瑞龍奉 旨差同旗員安姓往江浙密訪吏治今已由浙江回六安州托伊代為留心奏聞 上諭以敢於督撫前捏造全無影嚮之言卽張鵬飛在尙當治其罪况其弟乎令按捏稱旨意治罪

繙譯翰林大考

翰林學習國書蓋以備繙譯編纂之任故須專心熟

習辨析精微積學功深與年俱進始爲不負所選康熙年間館選之例庶吉士年四十五歲以下者悉皆分讀清書 世宗御極以來祇擇年少資敏每科不過十餘人蓋取其年富力強可收記誦繙譯之功也而翰林中 經散館遂謂無從考驗東置高閣以致教習三年轉爲虛設雍正十一年四月二十一日上諭嗣後庶吉士等雖經授職或數年以後或十年朕當再加考驗能否若仍然精熟必從優錄用以示鼓勵其或遺忘錯誤亦必加以處分可傳諭諸翰林知之于是繙譯翰林亦有大考

禁諱胡虜等字

先是 本朝人寫刊書籍凡遇胡虜夷狄等字每作空白或易他字如以夷爲彝以虜爲鹵等字雍正十一年 上諭舜西夷文至東夷原可不諱况 本朝並非胡虜嗣後如有臨文作字刻書照前空白更換者照大不敬律治罪遂著爲令

庶常廩餼

雍正十一年五月奉 旨今科選拔庶常仍令在翰林院衙門讀書俾教習諸臣得以朝夕訓課兼厚給廩餼資其膏火今庶吉士另立有庶常館並每月

給費皆

世宗養育士子 盛恩也

優禮大臣

雍正十一年十月初三日 上命安徽巡撫徐本前往致祭大學士張廷玉請假回里 上命給與驛遞夫馬其所過地方派撥弁兵並文武官員迎接悉照上年大學士鄂爾泰進京之例至明年回京亦照此例 世宗優禮大臣恩重如此

不言祥瑞

雍正十二年正月是年元旦立春恰遇甲寅年丙寅月戊寅日甲寅時瑞雪繽紛竟日盈尺考之占書最

爲佳祥豐年可慶諸王大臣上表稱賀

上却之

蜈蚣八字牆

上於壇廟等最爲敬謹十三年諭凡奏章遇有此等字懷中囊中俱可攜行不可夾帶鞞鞞之間先是仁和吳隆元康熙甲戌進士由庶吉官至太常少卿其奏天壇摺內有蜈蚣八字牆等字上交部嚴奏革職留任其敬謹如此

再舉博學鴻詞

先是雍正十一年四月初八日 上降旨並照康熙已未之例再舉博學鴻詞乃降 旨已久而外省之

奏薦者寥寥無幾十三年二月二十八日復降 旨催促如李衛吳應棻合舉二人而吳應棻又獨舉二人則皆宣化府進士 上以宣化北邊一郡尙有可舉之人何況內地各省之大可見李衛吳應棻乃寔心爲國家留意人材着再通行宣諭無論已奏未奏之省俱着再行遴選煌煌 聖諭可謂求賢若渴矣

淡墨錄卷十一

再舉博學鴻辭

綿州 李調元 雨村

乾隆丙辰元年 召試雍正十一年至十三年各部
院各省薦舉博學鴻辭諸人 欽命題五六天地之
中合賦賦得山雞舞鏡七言十二韻取一等五名劉
綸潘安禮諸錦于振杭世駿二等十名楊度江陳兆
倫劉玉麟沈廷芳夏之蓉汪士鎰陳士璠齊召南周
長發程恂共十五名 劉綸字繩菴武進人廩生乾
隆丙辰 召試博學鴻辭其山雞舞鏡詩有句云似



擬投村齋戢戢可能對語便闌闌 上盛獎之親拔
第一名授修撰公少不工書嘗從張石田先生授業
學書于紙背紙尾或斜豎批抹石田必正色戒斥謂
先儒言作字當敬自是書法益精進官至大學士諡
文定 潘安禮江西南城進士由主事陞員外郎丙辰
召試一等第二名授編修 諸錦字襄七號草廬
秀水人雍正甲辰進士改庶吉士散館改知縣又改
補教授乾隆丙辰 召試一等第三名授檢討晉贊
善著毛詩說二卷補饗禮一卷夏小正箋一卷錦工
十詠物有松毬柳帶竹粉榆錢唱和詩一卷 于振

金壇人雍正元年癸卯狀元授修撰改行人丙辰
召試一等四名授編修 杭世駿字大宗號董浦仁
和人丙辰 召試一等第五名授檢討著有續方言
二卷容杭日記二卷石經考異一卷四庫全書稱其
較顧炎武所考尤爲完密云世駿在京時首唱方鏡
詩二十四首傳誦都下和者自王侯公卿大夫方外
閨秀幾及千首誠僅事也記其一律云雲葉裁量片
片方水仙晴漾日生芒兩邊透照成三影四角廻中
稱五光宛似寫形歸畫幃不妨偷樣學青塘劇憐空
艷無人會輸與璇圖織錦張見查爲仁蓮坡詩話袁

子才云世駿沒後有奉斗者名戴近蓬乃世駿門人
一夕設壇請鬼見一人短白鬚披夾紗袍不冠而至
罵曰近蓬我弟子今夕設會獨不請我何也問之言
前生是法會上點香者名寄靈童子云 楊度江無
錫人拔貢生丙辰 召試二等第一名授庶吉士
陳兆崙字星齋錢塘人工詩古文制義尤枕經菹史
爲人所膾炙 召試二等第二名授檢討官太僕榕
城詩話兆崙天才駿發有承明著作之才而虛襟下
人人有寸美愛不去口詩自入閩後多至二百篇尤
爲杰作 劉藻本名玉麟山東荷澤人由舉人教諭

丙辰 召試二等第三名授檢討歷官至兵部尙書
雲貴總督緬甸事起自盡先是征緬時有昆明縣隸
葉果死三日復甦言被勾入冥司大殿外坐官甚多
皆手一簿判記甚忙判別則黑氣一團覆于簿上以
果不在死數放還果私問何簿曰人簿一獸部五應
劫者皆寫入黑雲劫簿中雖一騾一馬無錯誤畢竟
獸多人少問應此劫者省中爲何官曰第一卽汝總
督也後果應見新齊諧 沈廷芳字椒園仁和人監
生丙辰 召試二等第四名授庶吉士丙寅入直武
英殿同修起居注授編修改御史嘗閱朱竹垞瀛洲

道古館輯館選錄今板存館中亦盛舉也但不書字
號爲慊耳廷芳查聲山學士外孫也其父麟洲先生
宰文昌被累戍寧夏母查太淑人留居嘉善不從行
椒園每歲南北省親極行路之苦有詩云秋生紅豆
辭南國春到青銅赴朔方青銅者寧夏山名又雲影
有心隨望眼淚痕和綫綻征衣爲厲樊榭孝廉所賞
沈沒後張少儀有詩哭之云塞上草枯雙淚白瀛洲
雲淨一襟清草枯用斐子野事蓋紀寔也觀察父笠
亭先生宰印江與沈仝戍觀察徒跣萬里號呼求救
幸獲安全張母顧恭人若憲卽畢太夫人母也有挹

翠閣集與武林林以寧顧妣齊名隨官牂牁卒于官
所後尙書迎養秦關少儀自滇中解組來署白頭兒
妹唱和終朝太夫人有詩云千里迢迢客乍回相逢
歲盡笑眉開廿年髮遂梅花白一夜春隨爆竹來誰
料異鄉逢雁序細談舊事劃鑪灰殷勤傳語司更者
漏箭城頭莫浪催 夏之蓉字醴谷高郵人雍正癸
丑進士授教諭丙辰 召試二等五名授檢討督學
湖南歲試題象日以殺舜爲事有一生文云象不徒
殺之以水而并殺之以火也不徒殺之以火而又殺
之以酒也幕中閱文者大笑欲批抹而置劣等夏公

不可曰恐有出處且看作何對法其對比云舜不得于母而遂不得于父也舜雖不得于弟而猶幸有得于妹也通篇文亦奇警夏公改置一等欲召而問之而其人已遠出矣袁子才云按舜妹黜首與舜相得載帝王世紀按列女傳舜女弟繫祖君彥檄湯帝云蘭陵公主逼幸告終不圖黜首之賢反蒙齊襄之耻是此典六朝人已用之惟以酒殺舜不知何出又十餘年讀馬驢譯史方知象飲舜以藥酒出劉向列女傳見隨園詩話又一日值洞庭大風公欲趕到任日期至湖心風逾大見水面二短人面微黑挾舟行似

巡邏者舟人皆見之風定乃去初學署有怪見者必病夫人囑公祭不許是夜燈下閱卷聞哭聲自西來如沙打窻公厲聲曰吾已悉汝明日祭汝可也聲遂滅翌日跡其來處有破屋一間木主數十皆前任學臣閱卷募友卒于署者因爲文祭之怪遂絕有半舫齋集 汪士鏗休寧人副貢生丙辰 召試二等第六名改庶吉士 陳士璠字魯章錢塘人丙辰由附生 召試二等第七名改庶吉士授檢討辛酉典試四川副主考官正爲上海朱治子良裘先兆路公登是科鄉試第三十六名 齊召南字次風天台人副

貢生丙辰 召試二等第八名改庶吉士授編修著有水道提綱二十八卷官翰林所作因修 大清一統志外藩蒙古諸部是所分校故於北地諸水源最爲詳覈可以補水經之所未聞官至禮部侍郎 周長發字蘭坡號石帆山陰人雍正甲辰進士改庶吉士授江西廣昌縣丙辰 召試二等第九名授檢討歷陞侍講學士著有賜書堂集曾賦覺生寺大鐘歌最敏捷稱 旨視學浙江有永嘉學署和蘇詩百首最嘉 程恂休寧人雍正二年甲辰進士改庶吉士又改授員外郎丙辰 召試二等第十名授檢討

丙辰薦舉名試被放可考三十一人

袁枚字子才號簡齋錢塘人已未進士薦舉博學鴻詞雖報罷而名聲益起公卿間虞山王次山峻尤譽不絕口于是天下無人不知有袁子才自言乾隆丙辰 名試鴻博海內薦者二百餘人至九月試保和殿者一百八十人二百人中年最高者爲鄞縣萬經最少者爲枚自丙辰至丙申四十年矣今海內存者惟秀水錢籀石載及余二人錢八十又中風似是天憐能無自憐乎 鄞縣全祖望字謝山丙辰進士改庶吉士 名試鴻博全作公車徵士錄以同縣萬經

爲首以袁枚署尾已亥子才還杭州謝山少子名福
持其父小像索詩子才題一律有當年丹詔名耆英
驥尾龍頭記得清之句載集中 鄞縣萬經字九沙
康熙癸未進士 厲鶚字太鴻別號樊榭康熙庚子
舉人雍正辛亥有司聘修浙江通志雍正甲寅以縣
令薦舉博學鴻辭乾隆丙辰 召試放歸戊辰謁選
至京無所遇而回遂園其東園之書屋曰兩無塵齋
奉母以終老卒年六十一鶚未第時與周穆門諸人
好請乩仙一日有仙人降盤書曰我鶴靜先生也平
生好吟故來結吟社之權諸君小事問我我有知必

告大事不必問我雖知亦不敢告嗣後凡杭城祈晴
禱雨止瘧斷痢等事問之必書日期開藥方皆驗其
他休咎則筆卧不動每日祈請但書鶴靜先生四字
向空焚之仙輒下降有唱和詩尤清麗和雁字至六
十首如是一年樊榭穆門請與相見拒而不許諸人
再四懇求曰明日下午在孤山放鶴亭相候諸公臨
期放舟伺之至日景無所見疑其相誑各欲起行忽
空中長嘯一聲陰風四起見偉丈夫鬚長數尺紗帽
紅袍以長帛自挂十石牌樓上一閃而逝疑是前朝
忠臣殉節者也自此乩盤再請亦不至矣惜未問其

姓名

子不語

鶚工于詩其博綜最長于南宋有同人詠

南宋襟事詩至今膾炙人口富于學問善攷覈所著
宋詩紀事二百卷樊榭山房正續集二十卷俱已梓行
尙有南史纂逸史注宋詩紀事補遺東園雜誌若于
卷藏于家 張雲錦字龍威平湖人少以詩古文受
知于學使金壇于耐圃乾隆丙辰薦舉博學鴻辭放
歸著有蘭玉堂詩集十卷 朱稻孫字稼翁一字芋
坡秀水人彙尊其祖昆田其父也以詩文世其家查
慎行序其六峯閣詩稿以三世有集爲唐宋以來所
稀見困于場屋太倉王顯菴相國爲春秋館總裁引

爲助稻孫挾其家藏二百七十餘家之書以脩纂修
書成例得議叙州判以急友人李宗渭之難赴關中
還則已過遂不赴乾隆元年太倉王相國子詹事奕
清舉稻孫博學鴻辭科復不得志及纂修三禮李穆
堂以名聞于朝復不果性剛介與物多忤書法自成
一家尤精小楷初竹垞自嶺南歸攜羅浮蝴蝶與里
中人爲蝴蝶會越數十年而羅浮蝴蝶忽見于曝書
亭南深樹中稻孫作詩四首同時和者亦數十人爲
後蝴蝶會其豪興類如此見袖堂筆談 金佩仁和
人乾隆壬戌狀元笠之兄康熙庚子科舉人官湖北

孝感縣知縣 朱佩蓮字芥舟仁和人以藩郡薦鴻
博中壬戌進士官編修 徐笠山廷槐會稽人康熙
庚戌進士薦舉鴻博以山雞舞鏡詩雷同被議 沈
冰壺字清玉號梅史山陰人歲貢生著有古調自彈
集性孤峭於人寡所合常有古人不見我之恨喜博
覽家貧無書恒借書披閱有得卽見諸筆墨經史最
所窮究更熟勝國諸老軼事舉丙辰鴻博報罷詩
不規規講求音韻采色而善於持論著有咏史樂府
張鳳孫江南人薦舉鴻博有翰林落成 聖駕臨
幸紀恩詩云翰院重修古集賢翠華親蒞啟瓊筵雙

卮酒爲臺衡錫百韻詩教館閣聯天上雲璈翻玉瑄
殿頭寶炬徹金蓮蓬壺咫尺身難到作賦曾經瀆列
仙 黃之雋字石牧華亭人康熙辛丑進士由編修
晉中允提學福建以事鐫級薦舉鴻博以老病報罷
有試博學宏儒科不成自紀詩云繼述逢明聖初元設制
科大廷勤汲引廣宇極蒐羅翩翩來岡鳳菁菁集芷
莪都人千軌奮國士九霄摩鉅典光繩武新儀燦保和
五題涵學海兩試匯文河奧曠胸吞籀績毫指旋螺
羣英咸賈馬佳句必陰何烹鍊金融冶雕鏤玉切磋
日華紅灩灩天影碧瑤瑤軍校森而肅王公藹不苛茶

傳中使梳篋出大官鍋地迴精神眩秋深暑刻雉雄
姿方蹀躞朽質已婆娑昔夢醒何在頽齡出則那湖
懷良用緬纒悉不勝覩少壯書成癖浮沉命作魔偶
圖燕市駿迺鼓辟雍囂擢第衰遲及流光瞬息俄
兩朝棲玉署七載玷鑿坡磚影曾追李亭陰尙憶柯
凌雲邀 特眷染翰寡織訛日講絲綸接坊僚組綬
拖衡文闕嶠去陪祭 景陵過史局闕三館朝班廁
五紵淵冰慚齷齪深雪戒媵嬰拙宦頑如梗飛章巧
中窘含沙多疚痛碎壁罕摩挲削籍歸尋菊爲農學
藝禾鳧鷗盟雨瀨麋鹿伴煙蘿廢將荒調馬衰姬罷

掃蠹鴻冥奚纂弋雉耿未罹囹帶只紉蘭蕙衣唯製
菱荷峰環貧士堵谷統碩人邁以日如增線而年似
擲梭餌無徐市藥揮乏魯陽弋剩有丹心炯徒添白
髮皤 重華新日月肥遯舊巖阿草莽聞皆起塗泥
分久蹉忽膺東海薦猶恐北山訶文豈成翻水書難
作擘窠茄乾偏嗜好灰冷欲噓呵良友紛攀柳 清
時勸發軔檄因如火急冠遂與纓我遠舉身同鳥長
征力仗羸據鞍猶馬援遺矢未廉頗願接離階迹來
賡紉纒歌 龍飛真浩蕩奮負忘么麼隨例趨丹陛
連名謁玉珂尙乘朝氣銳何減壯顏酡粉滑媵雙摺

油濃墨一渦羽陵書穴蠹孔壁字盤蝌芹曝傾心獻
松雲逐韻哦賦成斯足矣詩就不違他薄暮當窻牖
輕寒到帽韉風高常扇蠟月暗未升娥便恐眸生醫
還疑體抱痲江花才欲盡祖雪意無多詎望金蓮撒
徒勞鐵硯磨戴星辭陛柅橐筆走陂陀息影寒山子
驚心春夢婆且淹霜後相待長路旁莎裘趁蒙戎煖
裝仍款段馱好歸江上權重理牧時蓑貫酒從焦革
栽花問郭駝隴頭聽擊壤水面看飛鏡對衰容笑
書逢老眼搓餘年隨磨蟻幻景任籠鵠穩坐耆英社
高吟安樂窩太平 堯舜日耕鑿飲恩波 裘曰修

字叔度新建人于庚申在京與袁子才同年同車遇
雨裘誦其師 梁仙來太史一聯云飛雨不到地輕
烟吹若塵甚嘆其工 梁機雍正辛丑翰林外出為
令高安相公薦鴻博入都與袁子才相遇于琉璃廠
書肆中咏桃花云渾疑人面飲下馬快題門贈妓云
欲作歌聲畏花落選詞先唱鎖南枝感策云老去還
嗟耳力退自吹羌管不聞聲沙邱云荆卿七首漸離
筑可惜不得逢祖龍 申笏山甫江都人舉人 錢
籀石載秀水人壬申進士 曹地山秀先新建人丙辰進士
吳槃字青然全椒人 周京字少穆錢塘人 王祖

庚華亭人與乃祖文恭公同日生故號生同丁未進士終身以不入詞館爲恨薦舉博學鴻詞被放兩子紹曾顯曾皆入翰林而不樂也官保定太守與彭芝庭尙書同出尹文端公門下有納涼聞笛云碧空如水淨無雲斗轉參橫夜欲分長笛不知何處起好風偏送此江聞江梅片片傷春暮岸柳絲絲縮夕曛曲罷無端倍惆悵階前涼露濕紛紛向庭楓號茶洋陝西人爲人詭誕不羈而結駟連騎忽而布衣藍襪賦詩有奇氣如落花平地二尺厚芳草如天萬里青月華照樹有烏鵲雲氣上天如白羊皆警句也薦

舉博學鴻詞被放官至戶部主事以上見隨園詩話

胡天游稚威山陰人與袁子才善博極羣書下筆千言不起草薦舉博學鴻詞以嘔血污卷報罷有落花句云是也却教屏外見仙乎曾向掌中安爲人傳誦 金德瑛字檜門仁和人丙辰狀元 金門詔江都人丙辰庶吉士 周玉章仁和人丁巳庶吉士 王會汾無錫人丁巳庶吉士 宮獻瑤安溪人已未庶吉士 沈德潛字歸愚長洲人已未庶吉士 金文淳錢塘人已未庶吉士 葉酉桐城人已未庶吉士 楊述曾字二師王戎榜眼 張甄陶福清人乙

五庶吉士 陳長鎮湖南武寧人戊辰庶吉士以上皆丙辰薦舉博學鴻詞 召試被放見館選錄

丁巳補試博學鴻詞

先是丙辰 召試薦舉博學鴻詞人尙未到齊至是陸續到京再請補試得一人二人等三人 萬松齡宜興人由舉人授中書丁巳補 召試一等第一名授檢討 朱荃桐鄉人附生丁巳補 召試二等第一名改庶吉士授檢討提學四川乾隆十五年四川總督策楞奏報學政失足落水 上意其必有營私舞弊之處交湖廣總督永興查奏朱荃家人始供

收受李爲棟銀兩貂裘等物爲伊子營求將其二子並取入學又王瑞霖亦以賄入其子並言匿喪考試賣生童九名及賣書漁利勒索告病給頂生員銀兩贖私 上大駭異特將朱荃之弟及家人並賄賣生童經手說合俱交督嚴審問罪李爲棟王瑞霖卽予正法策楞不先覺察又擬緩決交部嚴察此十七年九月二十七日事也荃有湯陰謁 岳忠武祠詩句云黃龍飲已成虛願白鶴歸應恥故鄉早見彈文來魏國枉將列像鑄申王 洪世澤福建南安人附生丁巳補試二等第二名改庶吉士 張漢雲南石

屏人進士授檢討改知府丁巳補試二等第三名授
檢討

淡墨錄卷十二

蜀綿 李調元 兩村

左玉右金

乾隆元年張文和公夜夢其父文端公英文和問今
科狀元父以左手指玉右手持金以加于頂曰汝知
之乎如此則得矣醒不解所謂榜發乃知金德瑛姓
名得者德也官至都察院左都御史是科榜眼曲阜
黃孫懋官至內閣學士探花金匱秦蕙田官至刑部
尚書

欽賜生員

總憲金公德瑛乾隆元年丙辰狀元以閣學視學江西考吉安府童生五鼓點名畢燈下見紅衣婦人從考棚趨出冉冉騰空而去問之僕隸皆見公心惡之卽以中庸必有妖華四字命題日正午諸生方握筆忽考棚傾倒壓死三十六人金公據寔奏聞上憐之俱 欽賜生員

父子先後同門

乾隆丙辰探花秦文恭公爲大司寇乾隆三十九年京師有無賴子韓六毆父致傷刑部直隸司官擬斬左右侍郎以傷非致命意欲減等文恭以名分攸關

理宜正法奉 旨依議是時司獄司李懷中監斬後三日韓六魂忽附懷中身言曰諸大人業已寬我而汝來斬我我死不甘故來索命聞者駭然以爲糊塗鬼而懷中竟卒見新齊諧人謂文恭過嚴畏其氣燄故移禍於懷中也文恭爲編修時充壬戌同考官先石亭公出其門下後公爲刑部尙書充癸未會試總裁余又以會試第二人出公門父子先後同門亦異事也向例父之房師而子又出其門者應用門下晚生帖稱太老師有欲認門生者則以門生與門下晚生兩刺並投而近例禁寫門生祇用光名帖卽門生

也于是以光名刺投文恭曰太老師尊而不親仍稱
老師可也時先北路公爲涿州牧領余見文恭求
訓文恭教以易謙卦六爻皆吉至今佩悔不忘也

得校書力

蔡新葛山先生曰吾校四庫書坐訛字奪俸者數矣
惟一事深得校書力吾一幼孫偶吞鉄釘醫以朴硝
等葯攻之不下日漸危弱後校蘇沈良方見有小兒
誤吞鉄物方云剝新炭皮爲末調粥三碗與小兒食
其鉄自下依方試之果炭屑裏鉄釘而出乃知雜
書亦有用也此書世無傳本惟永樂大典收其全部

余領書局時屬王太史排纂成帙蘇沈者蘇東坡沈
存中也二公皆好講醫葯宋人集其所論爲此書云

盛世者英

漳浦蔡相國新字次明號葛山文公世遠之子乾隆
丙辰二甲傳臚改庶吉士授編修歷官至禮部尙書
大學士年八十予告 上優崇故舊賜 御書盛世
耆英四字以榮之初公以康熙己丑年十二月初五
日生有算子平者謂公曰福星也位極人臣壽享大
鑿至是果驗

孝友

曹秀先字地山新建人乾隆丙辰二甲第三名由庶
吉士授編修善書凡聯對人得之重如拱壁所書聯
每家人竊出輒售四金尤工於集句刻有賜書堂集
句性孝友爲吏部侍郎時余爲文選司主事時余因
析居後有應分賠八百項載在遺囑分關應與二房
均分而二房于部文到籍具呈請于余俸內扣除具
呈上堂欲辨其事公謂余曰吾少孤兄管家務析產
時盡以佳田房自居而以劣者析吾吾時爲編修俸
薄不足贍家口全仗賣字爲活以至今日及兄歿後
有子二遊蕩不事生產返以見鬻其二子失業後衣

食無靠今俱養吾家中今汝見官吏部直認而已何
必辦事遂寢是年甲午余奉 命典試廣東遂請以
主考路費具呈戶部抵項公聞出差信於堂謁時笑
曰如何吉人自有天相也

知人

費雲軒先生元龍乾隆丙辰進士由知縣陞綿州知
州時余應羅江童子試考第一命肄業涪江書院言
他日必爲翰林吾江浙翰林亦當讓爾也時羅江令
爲乾隆戊辰進士葉鑒以余祖瑩訟圈出斷與賈姓
而並繫余祖欲辱之上控至州公廉得其寃遂叅葉

而還余瑩其他似此者皆復其故一時稱爲神明後
歷官至貴州按察時雲貴邪術最盛有奴隆馬而失
腿懸重賞於門隨有老人至解荷包出一小腿若蝦
蟆呵氣咒之兩腿如初又杖殺一惡棍閱三日後活
後毆其母母來控于官手一鐔曰此逆子藏魂鐔也
先將魂煉藏于鐔官用刑乃血肉之體以久煉魂治
新傷體故三日卽平復求先毀其鐔取風輪扇散其
魂庶逆子可直死如言斃之此二事載新齊諧亦可
爲先生神明之證至癸未余選庶吉士人以爲先生
知人

選庶吉士之多

乾隆元年丙辰庶吉士六十七人是科爲今 上登
極首科故館選獨多其名臣如大學士蔡新尙書秦
蕙田曹秀先副都御史金德瑛仲永檀總督鶴年鍾
音等各臣皆出其中可謂盛矣

蔬香閣

于敏中號耐圃金壇人乾隆二年丁巳狀元授修撰
歷官至文淵閣大學士余辛巳中書座師也予以書
稿失官已而奉 特旨以原官起用旋奉 特恩提
學廣東臨辭時公戒之曰汝氣性不好何不稍自和

平使一路功名到白頭豈不美乎予敬受命後分巡通永仍以所屬永平府知府弓養正徇庇屬員互相糾察被褫至今思之負此言也無子止側室曹氏生一女與曲阜衍聖公爲姻亞 上以公故封爲三品

夫人異典也公直機務兼南書房筆不停披然性淡泊蔬香閣種菜數畦作一聯云今日正宜知此味當年曾自咬其根猶是書生氣味

是科榜眼福清林枝春探花溧陽任端書

狐仙還席

錢瑄字方伯仁和人乾隆二年丁巳進士官至布政使方未遇時與蔡應彪至友吳某招飲其家素奉狐

仙二人與羣客至其家候至日晚腹已枵矣不見酒肴心以爲疑少頃主出有愧色曰今日飲諸公肴已全備忽狐仙攝去奈何衆客疑吳惜費以狐爲推蔡應彪曰主人若果治具必有水漿痕迹盍往厨房視之往驗則餘火未熄盤碗薑豉之物尙在始知吳非誑言衆客欲散獨蔡大呼曰果狐仙在此我有一言奉問今年乙卯秋闈我輩皆下場人如有一個中者狐仙還我酒肴如無一人中者狐仙竟全啖之我等亦沒興在此飲酒言畢出未久主人大笑來曰恭喜諸公酒肴今都還在案矣今年必有中者于是羣客

滄海錄 六
惟飲而罷是年錢登第蔡遲一科

天妃加封

周煌字景垣號緒楚一號海山涪州人其祖樵也孤身居峩眉山年九十九與山下鬻豆腐吳氏夫婦交易甚懽叟忽于溪中得金銀運堆床下求吳助遷居城中念無與守屬吳爲媒且曰非處子不可吳笑之叟願以萬金爲聘三十金謝媒吳念誰與九十九人婚者因不應其女年十九歲忽跪吳夫婦前曰女願婚周叟夫婦愕然女曰人各有命女如薄相嫁年少未必不孀如命好此叟尙有餘年幸獲子亦足支持

且父母無子止一女今以萬金三十金謝是生女愈于生男也想此叟獲此橫財恐天意未必遽終于此也吳夫婦以告叟遽跪地呼岳父母者再遂婚生子卽煌祖也年未冠入庠補廩祖至一百四十歲吳女先卒年已五十九矣又四年祖卒乃生煌乾隆二年丁巳進士選庶吉士授編修陞侍講十九年琉球國中山王世子尙穆遣陪臣毛元翼蔡宏謀等上表請封二十一年五月初七日 上遣周煌副正使侍讀全魁往封六月二十二日發海時煌等舟薄姑米山候風忽颶風作遭三晝夜接封大夫鄭秉和請易小舟

登岸暫避煌以 詔勅在舟不從二十四日風愈暴
是夜四股旋索十餘一齊皆斷桅走龍骨觸礁而折
底穿入水時既昏黑兼大雷雨帆葉厨棚吹落殊盡
倏見神火飛向桅木然招風旗而隆又海面一燈浮
來若烟霧籠罩狀于是衆悉呼曰天妃遣救至矣須
臾船身直趨向岸一礁石透入船腹不動亦不沉因
令解杉板小舟下水捧 詔節陸續登岸同舟二百
餘人舉慶更生皆云 皇上洪福舟到姑米港謁廟
行香煌獻願大能成扁神爲德其盛乎呼吸廻天登
彼岸臣何力之有也忠誠若水證平生聯以答神贖

天妃默佑之所致方顛播時煌等虔告天妃若默佑
平安當爲神乞加封號并于冊封之年明頒諭祭至
是具奏請加封諭祭 上命部議部查天后亦稱海
神康熙十九年 勅封海神天妃爲孚國庇民妙靈
昭應弘仁普濟天妃二十年閩提臣萬正色以天后
着靈奏聞 詔封昭靈應仁慈天后五十九年檢討
海寶冊封奉請春秋致祭乾隆二年閩督臣奏守脩
陳元美在洋遇風禱天后獲安奉旨加封福佑羣生
四字今應如所奏 奉旨加誠感威護四字並書明
封號卽于怡山院天后宮舉行祭事煌回京數月復

撰琉球國志畧十六卷于是年午二月十八表進煌
旋由中允陞侍講上書房行走晉侍讀學士陞內閣
學士晉兵部侍郎兩次奉差審理四川軍需部控二
案俱審虛反坐發遣以本籍人審本籍案異數也著
有海東詩集陞兵部尚書卒長子興岐乙未進士
庶吉士授檢討次子興岱辛卯進士庶吉士官至內閣
學士兼禮部侍郎提督廣東學政

釣龜

白瀛山西興縣人乾隆二年丁巳進士改庶吉士授
編修官至川東道時瀛以千金買一妾挂帆回任寵

愛異常舟過鎮江月夜泊舟妾推窗取水爲巨龜所
吞土人悲恨誓必得龜而後已傳論各漁船協力搜
拿有能得巨龜者賞百金船戶爭以猪肚羊肝套五
鬚釣爲餌上繫空罈浮于水面晝夜不寐兩日後果
釣得大龜數十人拽之不能起乃以船艙繫巨石磨
盤用四水牛拖之躍然上岍頭如車輪羣以利斧斫
之滾地成坑喳喳有聲良久乃死破其腹妾腕間金
鐲尙在於是碎其身焚以火臭聞數里一殼大數丈
堅過于鐵苦無所用乃構一亭以龜殼作頂亮如明
瓦窗至今在鎮江朝陽門外大路旁

名巡撫聯句

莊有恭字容可號滋園乾隆己未第一甲第一名進士及第授修撰 國朝廣東狀元自有恭始歷官至江蘇巡撫調浙江乾隆二十七年 聖駕三次南巡過嘉興侍 上遊鴛鴦湖登烟雨樓樓中舊有錢陳羣書趙孟頫耕織圖詩屏並書 上鑄鐘特磬二銘于壁 上指陳羣所書以問有恭奏言臣目近視實不能見 上為之大笑隨 各有恭聯句用石鼎體 御製滄湖換輪舟載咨携大吏延攬鏡中央 有恭 疊幘圖次第元璋首締構仲圭足標致各寧詫鴛鴦

御製利頗擅荷芰謂當烟雨濛乃值春光霽遊目

益悅心

有恭

對時兼得地青巒識送迎白鳥忘呵避

柔桑驗萌芽

御製繡壤嫌鼓吹耕織八政關鐘磬

元音肄老錢筆力健

有恭

蒙莊示蒙翳前虛豹尾隨

今預鵠頭伺隄桃竹醜紅

御製渚柳漸凝翠近遠

景畢呈吟咏興誠途何殊侍西清

有恭

竊幸迂南暨

遲牽載書船急控催詩轡遇榮三接承

御製育矢

載賸繼頻陰所恒憤屢晴實罕事却慮悞東作

有恭

誠然得西利三農足冬雪萬國來鞞瑞瞻天愜衆情

御製觀風塵予意陽舒固勝陰月計尤省歲最爾

惟清心體茲共濟義中間翳宇韻即調前事也自來
 上聯句皆 色履從諸臣未有獨命大吏者真君
 臣一德盛事也 御製賜有恭詩云己未親為策士
 文精衡藥榜得超羣起行不負坐言舉率屬偏能克
 已勤鶴市舊聲猶眷眷龍山新政更慙慙海棠正是
 投艱處盤石維安勉奏勲其 寵眷如此未幾陞吏
 部尚書協辦大學士乾隆辛巳余在中書時猶及仰
 瞻丰裁老成持重可為後進楷模未幾即予告去是
 科榜眼南昌徐逢震字石溪出編修官至通政使探
 花金匱秦勇均編修

袁子才詩

袁枚字子才號簡齋錢塘人薦舉博學鴻詞乾隆四
 年己未二甲三名進士選庶吉士初朝考題為因風
 想玉珂欲刻劃想字句云聲疑來禁院人似隔天河
 諸總裁以語設不莊將置孫山尹文端繼善時為大
 司寇力爭曰此人肯用心思必年少有才者尙未解
 應制體裁耳此庶吉之所以必需教習也倘進呈時
 上有駁問我當獨奏羣議始息袁之得與館選受尹
 公知從此始未幾 上命公教習庶吉士枚獻詩云
 琴爨已成焦尾斷風高重轉落花紅散館改江南沐

陽令風骨錚然不阿權勢引經折獄有儒吏風時民有娶婦者甫五月生一子鄉黨笑之其人不能堪以先孕後嫁訟其父翁越日集訊于庭觀者如堵枚盛服而出向其人舉手賀其人色愧俯伏座下枚曰汝鄉愚可謂得福而不知者矣繼問其婦翁汝讀書識字否對曰未也枚笑曰今日之訟正坐兩家不讀書自古白鹿投胎鬼方穿脅神仙荒誕固不必言而梁嬴之孕逾期孝穆之胎早降有速有遲載于史冊總之逾期者感氣之厚生而主壽早降者感氣之清生而主貴主壽者若堯與舜諒爾亦聞主貴者不必遠徵卽

如本縣亦五月而生雖不才亦入選詞垣出司民牧謂予不信令汝婦入問太夫人可也卽令人命婦抱兒入署頃兒繫鈴懸鎖花紅繡葆而出婦伏拜地下曰蒙太夫人優賞許螟蛉作孫兒矣枚正色謂其人曰若兒卽我兒善視之他日功名勿使出我下也衆齊聲附和于是兩家之羞盡釋後兒讀書食餼于庠奉枚長生祿位供養家不衰未幾調上元罷官人皆惜之後遂買山金陵築一菟裘名曰隨園構花種樹擁書萬卷日與東南名士觴咏其中不作出山想人望之飄飄若神仙中人枚少負才名落筆千言于經史

諸子百家之書無不融貫應舉制義膾炙人口登第
後年才弱冠遂肆力于詩常在尹總制幕中以門生
待之甚厚己卯八月枚江北獲稻歸飲于公所酒畢
與諸公子夜談公從堂後札示云山人在外初回家
姬必多相憶盍早歸乎袁題札後云夜深手札出深
閣勸我新歸應早回自笑公門嫩桃李五更婦子要
風催除夕公賜食物枚以詩謝云知公得韻便傳箋
倚馬才高不讓先今日教公輸一着新詩和到是明
年公見之大笑

此
見魚

元圭大師

陳大輪字紫山溧陽人戊午舉人乾隆四年己未二
甲四名進士改庶吉士授編修官至侍讀學士卒大
輪初入學時年才十九偶病劇夢紫衣僧自稱元圭
大師握其手曰汝背我到人間盍歸來乎陳未答僧
笑曰且住且住汝尙有瓊林一杯酒瀛臺一碗羹喫了

淡墨錄
再來未遲屈其指曰此別又十七矣言畢去陳驚醒
一汗而痊己未中進士入翰林陞侍讀學士三十八
歲秋痢不休因憶前夢十七年之期自知不起常對
家人笑曰大師未來或又改期亦未可知忽一日早
起焚香沐浴索朝衣冠着之曰吾師已來吾去矣同
年金質夫編修素好佛者在旁喝曰既牽他來又拖
他去一去一來是何緣故未言畢踟躕而逝

燕子磯神

裘曰修字叔度新建人乾隆元年丙辰薦舉博學鴻
詞四年己未進士改庶吉士授編修丁卯主湖北試

壬申己卯兩主江南試庚午癸酉兩主浙江試丙辰
充會試總裁皆前此未有也旋奉 命視巴理坤軍
事賜 御用冠服以寵其行歸朝奏對稱旨 命軍
機處行走曰修諳河務屢奉 命往河南山東江
南經理河渠當是時河南水溢數郡所被災州縣甚
多曰修疏水之達于淮者四枝流六十有三民得永
遠寧居所治克副 聖慮而直隸如永定大通白漕
孰宜堤堰孰宜疏濬以達諸海凡 上指授方畧悉
以屬之無不允協積勞成疾卒 上聞震悼賜金祭
葬諡曰文達年六十有二曰修貌清癯神采奕奕以

文學侍從編歷六部更兼司撰述充會典館總裁奉
勅撰熱河志太學志西清古鑑秘殿珠林石渠寶
笈錢錄等書最後充四庫全書總裁公自著有諾臯
集並詩文奏疏若干卷所作文以歐陽文忠公爲宗
常道滁州得歐陽公畫像乞 上題人亦謂公文似
歐陽書傲張卽之 上以內藏卽之書華嚴經殘本
命公補書人莫能辨公之才無不優爲而河渠特
其一也然功施于民適以治河最著傳公治某水有
田夫者哭至前如欲有言者官屬呵退之公呼之進
與語竟得地勢高下之宜後久而不貲其虛衷博採

類如此

戴震誌銘

未卒之前一日語家人曰我本燕子磯

水神今將復位死後汝等奉柩還江西必過此磯有
關帝廟可求籤如係上上第三籤則知我仍爲水神
否則或有譴謫不能復位矣言終卒家人聞之疑信
參半有老蒼頭獨信之堅謂曰公爲王太夫人所生
太夫人本籍江寧渡江時曾求子于燕子磯水神夜
夢袍笏者來曰與汝一佳兒逾年生公公妻熊夫人
扶柩至燕子磯如其言卜于關帝廟果得第三籤遂
舉家大哭燒紙錢蔽江立木主于旁有兩江總督相
國尹文端公詩碣焉曰修工詩爲庶常與同年袁枚

沈聖錄
友善枚歸娶公送以詩云畫壁旗亭句浪傳藍橋歸
去會神仙從今厭看閒花草新種湖頭並蒂蓮時枚
有許郎願狎之故調之云後枚寄居金陵常往蘇州
阻風燕子磯乃揖其主而題壁曰燕子磯邊泊黃公
壚下過摩娑舊碑碣惆悵此山阿短鬢皤皤雪長江
渺渺波江神如識我應送好風多次日果大順風不
語子五長子麟編修先公卒次子師三子行簡皆國
子監生四豫五遵慶

老詩翁

沈德潛字確士號歸愚長洲人乾隆元年丙辰薦舉

博學鴻詞三年戊午中鄉試第二四年己未二甲第
六名進士改庶吉士時年已六十矣壬戌散館授編修
是年六月初十日隨班引見奏對畢 上諭大學士
曰沈德潛係老名士令和消夏十詠餘願和者亦和
于內閣軍機房分給筆札 賜飲及餅餌瓜果午刻
至未成詩六章時和者編修裘曰修蔣麟昌鞠遜行
檢討陳世烈廖鴻章越翼日傳 旨嘉獎 賜文紗
越葛有差九年甲子奉命典湖北鄉試事竣十年乙
丑偕內閣學士涂逢震典武會試陞內閣學士兼禮
部侍郎丁卯乞假省墓奉 旨贈其先人如其官復

賜詩褒之有清朝舊名士吳下老詩翁向每誦新句
猶然見古風同朝官皆謹用此二十字爲韻傲賀知
章還四明例贈行假滿復官充經筵講官十三年戊
辰充會試總裁以副兵部尙書蔣溥兵部左侍郎鄂
容安殿撰爲會稽梁國治後官至大學士己巳陞禮
部尙書年近八十請老告歸 上憐其意許之並
命編讀 御極以來詩集復 命加尙書銜在籍食
俸以示眷戀陞辭日 上面諭壬申萬壽五旬卿是
時望九當來一晤德潛陞辭紀恩詩曰蓬壘數載貳春
官趨待承華道孔顏身老蹉跎難稱職 主恩優渥

許還山此行就日辭丹鳳敢擬臨風放白鷗五夜夢
魂猶眷戀早朝猶入紫宸班是時浙江嘉興刑部侍
郎錢陳羣亦在食籍俸 上稱兩詩翁凡有 御製
皆驛寄命和不絕卒謚文愨著有歸愚詩鈔十二卷
歸愚文讀十二卷

僧畫麒麟

蔣麟昌字靜存陽湖人乾隆四年己未二甲七名進
士改庶吉士授編修生時其祖夢異僧擔十二經擲
其門俄而長孫生故小字僧壽及長名壽昌以避國
諱又自夢僧畫麒麟一幅與之遂名麟昌十七歲舉

考廉十九歲入詞林二十五歲卒性傲兀不羈過日
成誦詩好李昌谷有驚沙不定亂螢飛羊燈無燄三更
碧之句常曰文章之事吾畏袁子才而愛裘叔度他
名宿如沈歸愚易與耳卒後三日其遺孤三歲披帳
號叫曰阿爺僧衣僧冠坐帳中家人爭來遂不見袁
子才曰靜存始終以僧爲鴻瓜之露其爲戒律輪迴
似矣然吾與之談輒痛詆佛法而深惡和尚何也

文恭持正

程文恭公諱景伊字聘三號萃田武進人乾隆四年
己未二甲進士改庶吉士授編修有詩名于應制更

工賦耕籍詩有十里青沾沽酒旆一肩紅滴賣花人
句爲儒林膾炙歷官至吏部尙書內閣大學士三十
九年甲午考差充讀卷官 欽命詩題善人爲寶余
時爲文選主事與試有句云南國人堪憶東平語不
忘先生擬第一而金壇于相國以孟藝公儀子爲政
子柳子思爲臣余文內魯繆公繆字寫作穆字蓋繆
穆古通用也而于以爲白遂以殿撰黃軒擬第一而
以余改第六先生猶以爲屈然不知爲余也每對屬
司輒背誦前二句言已查翰林中無此卷不知究爲
何人一日畫稿畢又向郎中吳垣舉前句垣已早見

涉墨錄
余稿對曰司官蜀人李調元句也自是歎服每以國
士待之丙申保余員外郎丁酉余以議湖撫陳輝祖
咨部補劉培章監利典史事同司皆議駁而予獨議
准以至忤滿郎中承保于五鼓上 朝峻滿尙書舒
阿兩相國具摺奏適侍郎邁拉遜不肯曰司官
有所見原准不畫押此向例也奏恐遭飭爲之力言
于兩相乃曰且調簡驗封留爲今冬京察再說蓋欲
填八法也邁以告先生先生曰至其時吾當力爭之
十二月吏部堂官司集于圓明園朝房京察過堂
畢舒阿俱不語而先生見手摺將余名尖出問曰此

尖何等舒曰浮躁先生曰李司官在部有年學問人
品俱可保薦縱不拔一等等何至入八法也舒阿以畫
稿事對先生曰雖不應已調下司矣舒阿遽拂然曰
我等旗人自不如漢人同鄉同年門生相知之深也
先生曰予江南李四川不但不同鄉亦不同年且余
自翰林至大學士惟充房考亦未特命主考學政何
門生之有舒阿益怒遽起曰余二人議已定不願者各
奏先生駭然不復爭出朝謂余曰不必言矣歸可教
書何必做官也向例填浮躁者止降級須候引見戊戌
五月二十九日考功帶引見是日同帶十人九人皆

老疾獨余年力俱壯 上問署吏部尙書福公隆安
曰此人何以填浮躁對曰此舒阿所辦聞不盡押勸
之盡復銷去 上曰司官有不合于心者原許兩議
遂降 旨李調元因何事填入浮躁之處着軍機大
臣傳吏部堂官明白回奏于金壇等乃查案並傳堂
官至軍機處問該員平日辦事究竟如何先生對曰
勇往軍機據語覆奏 上諭李調元着仍以吏部員
外郎用卽先赴部到任是時舒已死永保隨阿出差
雲南未回余于六月初一日到任投供人員如雲皆
引領擠觀曰此鐵員外也並嘖嘖稱先生持正不阿

云未幾阿永回部見復用甚悌其意而余亦進退兩
難八月 命提督廣東學政 上曰汝乃朕提拔之
人看汝在司難走今命汝提學須當勉力報效又曰
汝若在明朝得罪嚴嵩張居正等早身家不免矣戒之
啟行日先生與金壇戒之曰汝受 恩如此以後當
戒氣性使一路功臣到白頭不更佳乎嗟乎誰知任
滿回京而先生已薨卽陞通永道甫二年而余仍與
屬下永平府知府弓養正對揭兩敗余遣戍伊犁當
差弓亦坐臺俱贖歸終以氣性敗今林下又十年矣
回憶先生諄諄教戒言猶在耳輒不禁淚潄潄下也

今擬撰本朝人物志故縷述如此以誌知己之感云
先生卒予祭葬諡文恭無子

恭毅除盜

李湖字又川號鑑堂南豐人乾隆己未進士由縣令
大名府知府陞通永道歷陞至雲南巡撫爲人方眉
廣額聲如洪鐘嚴翼無笑容人比之包孝肅時雲貴
總督彭寶貪婪懼其彈劾稍爲斂戢復降氣論交登
堂拜母湖不忍奏然卒爲所累革職 命往四川辦
理金川軍需奏銷仍授廣東巡撫時番愚菱塘灣爲
盜藪出沒數百人劫掠官民無數前後大吏不敢過

問湖下車卽密行踴訪得實遂商之總督巴延三延
三初猶豫旣乃決委按察使汪新同廣州府李天培
率兵千餘人捕之天培畏怯言盜勢炎甚恐文官率
兵不能撲斃湖怒曰爾畏死耶如殺爾知府吾當統大
兵至爲爾報仇若殺我巡撫 皇上自有天兵至爲
巡撫報仇何畏耶若不前當叅汝以徇天培遂隨臬
司往四面設伏夜半鼓譟而入直搗其巢巢名老鼠
山三面臨海其賊首梁亞香聞風卽率其醜類施鎗
矢抗拒官兵踴躍爭先擒其賊百餘人亞香見勢不
敵卽遁至海邊扳倒枯樹擲之水中驕身抱樹而逃

于海汪命善泗者駕小舟擄于海中時庚子年五月也奏聞 上嘉之命嚴審其黨湖派布政司梁同書按察使汪新糧儲道李廷楊率府縣于署大堂前搭棚刑訊務使無縱無枉匝月案成共審一百八十八所劫數百案請 王命同日決于教場改鑄大鐵猫于老鼠山鎮之自是盜風始息先是未決前一日請巴督會審列一百八十人于階下巴至問曰爾等尙有冤枉否中一囚遽翹首喊冤湖卽令批其頰抗聲謂巴曰如有冤叫伊等于閤王殿前指名告我李湖與總督無干也巴良久從容謂湖曰貴撫疊加覆察

自無冤抑但余旣蒙見邀會審豈可默無一言湖乃謝時余方提學廣東親見其事後余任滿覆命 上問曰菱塘之事雖是督撫同奏看來巴延三未必能辦必出李湖也余奏曰事本李湖訪聞而用兵則巴延三協差武弁同心緝獲 上以爲然湖逾年卒于官 上聞悼恤予祭葬加贈尙書銜諡恭毅官其子袁子才云又川巡撫廣東以清嚴爲政輿人歌云廣東真樂土來了李巡撫聖眷甚隆而積勞成疾薨時袁樹香亭往送入殮見公面目手足作黃金色光耀照人亦一奇也在官清儉衣帽皆質古侍者不許衣紈紬

其食肉二觴奉繼母太夫人已則素菜而已絕不修理衙署嘗曰居官如傳舍粉藻徒苦民也爲通永道時用東坡詩語扁其聽事廳曰鴻雪堂題一聯干柱日人苦不自知願諸君勤攻吾短弊去其太甚與爾衆率由舊章爲粵撫時每歲貢不過土儀茶葉荔圓等粵爲洋貨充牣之地如自鳴鐘時辰表皆量俸所入雇匠于署監製從不索之洋帕 上亦量收之嘗問大學士和珅曰當今督撫誰清對曰莫如李湖觀其貢可知也先巡撫貴州有入境口號云雙旌遙指貴陽城紫蓋紅旗夾道迎自愧書生當重任不知何以報昇平

恭毅嚴肅而待士獨寬在廣監臨不許兵役搜檢以故闈內多夾袋亦太寬所致云

金蓮榮遇

古來君臣唱和帝舜臯陶之賡歌成王召穆之遂歌尙已三代後如漢武帝唐太宗元宗宋仁宗皆有賡颺然皆君唱臣和從未有臣作詩而君和者乾隆七年二月二十七日庶子張南華鵬翀奏進經史名對賞 賜御書鵬翀以所畫春林淡靄圖進呈並題六詩于上末用頭字韻云珍秘琅函特許求他年擬結賜書樓天公定遣雲霞護長有龍光在上頭 上用

韻 賜和六首有題其畫云吟詩不用錦囊求好句
還多趙倚樓此日金蓮為誰撒他年佳話紀池頭以
君而俯和臣詩從古帝王未有此冲然若谷也而
直以東坡金蓮事比之尤為奇遇是日 賜松花石
硯上有 御銘以靜為用是以永年八字再和重進
末云宜賜頻仍不待求勝將仙樂下珠樓詩成天上
攜龍尾畫絕人間說虎頭南華詩既敏捷 上亦天
縱多能每日宣召至再至三一時詞館諸臣俱榮其
寵皆有和詩南華彙為金蓮榮遇集君臣賡歌一堂
誠千載嘉話也南華翌日又以所畫日長山靜便面

進呈 上題其畫云彷彿前生是為三畫禪瀟灑擅
江南大癡更擅坡仙筆勅敵江山兩不慙南華恭和
云疎野平生似魏三敢同竹箭擅東南偶然撥墨承
天獎林澗還愁抱媿慙蓋亦以東坡許之其寵異如
此



